

ԱՐԵՒՍՏԵԱՆ ՀԱՅԱՍՏԱՆԻ
ԿԱՌԱՎԱՐՈՒԹՅՈՒՆ

GOUVERNEMENT
D'ARMENIE OCCIDENTALE



BATI ERMENİSTAN
HÜKÜMETİ

ПРАВИТЕЛЬСТВО
ЗАПАДНОЙ АРМЕНИИ

Երբ Դավութօղլուն համեմատում է քրդերին եւ հայերին, իրականում նա փորձում է խոսել պայմանագրերի հողվածների լեզվով

«Քուրդ զինյալներն այսօր նման են հայ ավազակներին, ովքեր համագործակցում էին ռուսների հետ», - Բինգյոլում կազմակերպված ընդունելության ժամանակ հայտարարել է Թուրքիայի Հանրապետության վարչապետ Ահմեթ Դավութօղլուն: (1)

Ի՞նչ լեզվով է արտահայտվում Թուրքիայի Հանրապետության պաշտոնյան. ղիվանագիտության, իրավունքի, միջազգային իրավունքի սկզբունքների՞ ու նորմերի՞: Ո՛չ, ամենեւին: Ըստ էության, Դավութօղլուն վերոնշյալ համեմատությունը ձեւակերպում է Բաթումի, Ալեքսանդրապոլի, Կարսի, Մոսկվայի պայմանագրերի համապատասխան հողվածների ոգով ու տրամաբանությամբ:

Հասկանալի է, որ այս հարցում մեկից ավելի խնդիրներ գոյություն ունեն, այդ թվում եւ Հայերի ցեղասպանության փաստի ընդունումը Թուրքիայի Հանրապետության պաշտոնյայի կողմից, սակայն մենք քննարկեն դրանցից երկուսը. ա/ Դավութօղլուի համեմատության լեզուն եւ պայմանագրերը եւ բ/ Մոսկվայի պայմանագրի վերանայման նշանակությունը հայ ժողովրդի համար:

ա/ Դավութօղլուի համեմատության լեզուն հասկանալու համար պետք է նայել թուրքական կողմի կնքած պայմանագրերը մի կողմից ՀՀ-ի եւ ՀԽՍՀ-ի, մյուս կողմից՝ Խորհրդային Ռուսաստանի միջեւ: Հայ ժողովրդին եւ Հայաստանին վերաբերող այդ պայմանագրերում թուրքական կողմը միշտ փորձել է ներառել հատուկ հողված, որի միջոցով խոչընդոտել է հայկական հայրենասիրական ուժերի ձեւավորումը:

Այդ հարցն առաջին անգամ ներառվել է Բաթումի պայմանագրի մեջ (4 հունիս 1918 թ.): Այնտեղ 4-րդ հոդվածում նշված է.

«Հայկական Հանրապետության կառավարությունը պարտավորվում է գործունե կերպով հակազդել, որպեսզի ոչ մի բանդա չկազմավորվի եւ չզինվի իր տերիտորիայի սահմաններում, ինչպես եւ զինաթափել ու ցրել բոլոր բանդաները, որոնք կփորձեն թաքնվել այնտեղ»: (2)

Ահա թե որտեղից է ծագում այդ չարաբաստիկ «բանդա-ավազխումբ» արտահայտությունը, որով իրականում թուրքական կողմը փորձել է բնորոշել հայ

ժողովրդի ապրելու, զարգանալու եւ ապագա ունենալու անբեկանելի իրավունքները պաշտպանող հայ մարդկանց, խմբերին կազմավորումներին...

Ալեքսանդրապոլի պայմանագրում (2 դեկտեմբեր 1920 թ.) այդ խնդիրը շարադրված է մի քանի հոդվածների միջոցով: 'Դրանք՝ 4-րդ, 5-րդ, 6-րդ հոդվածները, ամբողջությամբ ներկայացնում ենք ծանոթագրության մեջ: (3)

Կարսի պայմանագրում (13 հոկտեմբեր 1921 թ.) նույն խնդիրը ձեւակերպվել է 10-րդ հոդվածում.

«Պայմանավորվող կողմերը պարտավորվում են իրենց տերիտորիաներում արգելել այնպիսի կազմակերպությունների եւ խմբերի առաջացումն ու գոյությունը, որոնք ունեն մյուս երկրի, կամ նրա տերիտորիայի մի մասի կառավարության դերն ստանձնելու հավակնություն, ինչպես նաեւ պարտավորվում են իրենց տերիտորիայում արգելել այնպիսի խմբերի գոյությունը, որոնց նպատակն է պայքարը մյուս երկրի դեմ»:

Ինչպես տեսնում ենք 1918-1921 թթ. ընթացքում ՀՀ-ի եւ այլոց մասնակցությամբ կնքված պայմանագրերում թուրքական կողմի պահանջով մշտապես ներառվել են հոդվածներ, որոնց միջոցով փորձ է արվել խոչընդոտել Հայկական Հարցի վերաբացման ցանկացած հնարավորություն, ինչպես նաեւ հայկական այն կազմավորումների կամ կազմակերպությունների առաջացումն ու ձեւավորումը, որոնք կարող էին առաջադրել հայկական իրավունքները հետապնդելու կամ այդ իրավունքները պաշտպանելու ծրագրեր, ընդհուպ մինչեւ ազատագրական պայքարի դիմելու հարցադրումներ:

Պետք է ասել տասնամյակներ շարունակ նրանց հաջողվել է այս խնդիրը իրականացնել, ամեն դեպքում հայկական հայրենասիրական ուժերը մշտապես մեծ խնդիրների հետ են բախվել, թե արտերկրում եւ թե մանավանդ Խորհրդային Հայաստանում եւ ԽՍՀՄ-ում:

Այս գործընթացի ծավալմանը նպաստել է նաեւ միջազգային ընկերակցության հիմնական դերակատարների անհաղորդ կեցվածքը հայ ժողովրդի իրավունքները ընդունելու, ճանաչելու, իրականացնելու հարցերում, ինչն էլ նոր հույս ու եռանդ է հաղորդել թուրքական կողմի հակահայ ծրագրերին:

Մոսկվայի պայմանագրում (16 մարտ 1921 թ.) այդ նույն խնդիրը շարադրված է 8-րդ հոդվածում, բայց ամբողջական հոդվածը կներկայացնենք մեր նյութի երկրորդ մասում, այստեղ միայն նշենք, որ թուրքական կողմի մտահոգությունը, բառապաշարն ու մտածողությունը մնացել է նույնը, բան չի փոխվել:

Սա է նախապատմությունը եւ իրականությունը, սակայն Թուրքիայի Հանրապետության պաշտոնյան այս հարցում հաշվի չի առնում այն հանգամանքը, որ ռազմաքաղաքական իրադարձությունները Մերձավոր Արեւելքում զարգանում են այլ տրամաբանությամբ, որոնց արդյունքում անպայման առաջանալու են ժամանակավրեպ պայմանագրերը վերանայելու անհրաժեշտություն, այդ թվում, դրանք չեղյալ հայտարարելու միջոցով:

Իսկ դա իր հերթին նշանակում է, որ վերոնշյալ լեզվական համեմատությունը տեղին չէ, քանի որ պայմանագրերը մեր աչքի առաջ վերածվում են ժամանակավրեպ համաձայնագրերի ու առաջանում է նոր իրողությունները՝ նոր պայմանագրերով վավերացնելու ու հաստատելու կարիք, այդ թվում եւ Արեւմտյան Հայաստանի հայերի իրավունքների մասով՝ Արեւմտյան Հայաստանի նկատմամբ, որոնք այլեւս ոչ մի կերպ չեն կարող անվանել, այսպես կոչված, «ավագախմբերի» կողմից ներկայացված հնարավոր պահանջներ:

բ/ Այժմ Մոսկվայի պայմանագրի վերանայման նշանակության մասին հայ ժողովրդի կյանքում:

Եթե շատ հակիրճ արտահայտվելու լինենք, ապա Մոսկվայի պայմանագրի 8- հոդվածով կոդմերը վերցրել են հետեւյալ պարտավորությունը.

«Պայմանավորվող երկու կողմերը պարտավորվում են իրենց տերիտորիաներում արգելել այնպիսի կազմակերպությունների եւ խմբերի առաջացումն ու գոյությունը, որոնք ունեն մյուս երկրի, կամ նրա տերիտորիայի մի մասի կառավարության դերն ստանձնելու հավակնություն, ինչպես նաեւ պարտավորվում է իրեն տերիտորիայում արգելել այնպիսի խմբերի գոյությունը, որոնց նպատակն է պայքարը մյուս երկրի դեմ: Ռուսաստանն ու Թուրքիան փոխադարձության պայմանով ստանձնում են նույնպիսի պարտավորություն նաեւ Կովկասի Սովետական Հանրապետությունների վերաբերմամբ»:

Սա էլ եղել ԽՍՀՄ-ում եւ Խորհրդային Հայաստանում ապրող հայերի հայրենասիրական ամեն տեսակ դրսեւորումների արգելքների, արգելանքների ու հետապնդումների պատճառը, այդ թվում՝ անհեթեթության հասնող, երբ օրինակ Զորավար Անդրանիկին նվիրված երգը երգելու մեղադրանքով հայ մարդուն կարող էին անվերջ հետապնդել, նույնիսկ աքսորել:

Զարմանալին սակայն այն է, որ եթե ռուսական կողմը այդ պայմանավորվածությանը հավատարիմ մնաց եւ, հավանաբար, հավատարիմ է մինչեւ այսօր, ապա թուրքական կողմը այդ պարտավորվածությանը հավատարիմ չի եղել երբեք, նույնիսկ ստորագրման պահին, որովհետեւ պայմանագրի վավերացման ստորագրությունը դեռ չչորացած թուրքական կողմը սատարել ու հովանավորել է մյուս կողմին ընդդիմադիր ամեն տեսակ անհատների, կազմավորումների ու կազմակերպությունների: Այդպես է մինչեւ այսօր: **(4)**

Ըստ էության, Մոսկվայի պայմանագրի վերանայումը եւ չեղյալ համարումը, առաջին հերթին, ունի այն նշանակությունը, որ Ռուսաստանի Դաշնության մեջ ապրող հայը, առանց հետապնդումների ենթարկվելու վախի՝ կկարողանա ազատորեն նշել Հայերի ցեղասպանության հիշատակի ու ոգեկոչման օրը, հնչեցնել հերոսներին նվիրված երգեր ու բանաստեղծություններ, ապրել՝ քիչ թե շատ հայեցի կյանքով ու ազգային մտահոգություններով:

Մնացյալը... այն, թե իրականում ինչո՞վ պետք է փոխարինել Մոսկվայի պայմանագիրը դա վերանայելու կամ չեղյալ համարելու պարագայում, այլ ոլորտի հարցադրումից է, որտեղ ընդամենը պետք է հիշել 1918-1920 թթ. ընթացքում հայությանը եւ Հայաստանին նվիրված որոշումներն ու պայմանագրերը, այդ թվում՝ Ռուսաստանի Կառավարության Դեկրետը Արեւմտյան Հայաստանի մասին, Սեւրի Խաղաղության պայմանագրի Հայաստանին վերաբերող հոդվածները, ԱՄՆ 28-րդ Նախագահ Վուդրո Վիլսոնի Իրավարար վճիռը Հայաստանի եւ Թուրքիայի սահմանի վերաբերյալ... Որոշումներ ու պայմանագրեր, որոնք կայացվել են, սակայն մինչեւ այսօր չեն իրականացվել:

Տիգրան Փաշաբեկյան

Արեւմտյան Հայաստանի Հանրապետության Վարչապետ

23.03.2016 թ.

Ծանոթագրություն

1. Տես, Դավությոզլուն համեմատում է քրդերին եւ հայերին, Գեւորգ Ստամբուլյան, 29.02.2016, azatutyun.am:
2. Նշված պայմանագրերը Տես, Ջոն Կիրակոսյան, Ռուբեն Սահակյան, «Հայաստանը միջազգային դիվանագիտության եւ արտաքին քաղաքականության փաստաթղթերում՝ 1828-1923թթ.», «Հայաստան» հրտ., Երեւան, 1972:
3. Տես նույն տեղում, Ալեքսանդրապոլի պայմանագիր, 2 դեկտեմբեր 1920 թ., 4-րդ, 5-րդ, 6-րդ հոդվածներ.

«4. Անկեղծորեն ձգտելով վերացնել Անտանտայի իմպերիալիստական կառավարությունների հետագա մեքենայությունները, որոնք կարող են խախտել երկրի անդորրությունը, Հայաստանի կառավարությունը համաձայնում է, բացի թեթեւ եւ երկրի կարգն ու անվտանգությունը պաշտպանելու համար բավարար քանակությամբ զենք ունեցող ժանդարմերիայից, սահմանների պահպանության համար չունենալ այլ ռազմական ուժ, բացի 1500 զինվորից բաղկացած ջոկատից՝ 8 լեռնային կամ դաշտային հրանոթով եւ 20 գնդացիրով: Ձինապարտությունը Հայաստանում պարտադիր չի լինի... Հայաստանին իրավունք է վերապահվում բերդեր (ամրություններ) կառուցել եւ այնտեղ դնել ծանր հրանոթներ... այնպիսի քանակությամբ, որը նա հարկավոր կհամարի, պայմանով, որ չդնի 15 սանտիմետրանոց տրամաչափի եւ հեռահար հրանոթներ, որոնք գործադրվում են ինչպես հայկական, այնպես էլ ուրիշ բանակներում:

5. Հայաստանի կառավարությունը սրանով համաձայնում է Թուրքիայի քաղաքական ներկայացուցիչներին կամ դեսպանորդին, որը հաշտություն կնքելուց հետո կգտնվի Երեւանում, թույլ տալ ըստ իր ցանկության տեսչություն եւ հետաքննություն կատարել վերոհիշյալ պայմաններին վերաբերող հարցերի գծով: Իր կողմից Թուրքիայի... կառավարությունը

պարտավորվում է իր զինված ուժերունը տրամադրել Հայաստանին, երբ այդ պահանջի արտաքին կամ ներքին վտանգը եւ երբ Հայաստանի հանրապետությունը դիմի իրեն մատնանշված խնդրով:

6. Պայմանավորվող կողմերը համաձայնվում են նախկին սահմանի տերիտորիայում իրենց տեղերը վերադարձնել բոլոր գաղթականներին, բացառությամբ նրանցից, ովքեր արտաքսվել են համաշխարհային պատերազմի ընթացքում եւ թշնամու շարքերում կռվել են իրենց կառավարության դեմ եւ նրանցից, ովքեր մասնակցել են ջարդերին: Պայմանավորվող կողմերը պարտավորվում են հայրենիք վերադարձող գաղթականներին տալ այն իրավունքները, որ տրվում են փոքրամասնություններին առավել քաղաքակիրթ երկրներում»:

4. Shtu, Виктор Надеин-Раевский, Зачем России «дружба» и «братство» с Турцией ?, 8 Февраля 2016, <http://regnum.ru/news/polit/2074091.html>.